

## Papia Jems da Mandagit

### *But piso gen*

Papia on Yesu dakon padige Jems da mandagit. Jems unun Yesu yolyol amin Jerusalem egipgwit dakon kila amini egipgut. (Yabekbi 15.13 unudon koki.)

Jems da on papia mandagit unjungwan Pin kop dakon minjat aminyo da ni anpak tagisi ban yolek ani dakon gen tagisi morapmi mandagit. Minjat aminyo da nandak nandak tagisi ban timigek ae Pin kop dakon gen pakyan si abidan kimotni do tilak gen morapmi mandagit.

Jems da gen tebai yan yosok: Yesu nandan gadan imjak amin isal egipmi mini. Amin do anpak tagisi ban an yomin kimotjak, unun da gak nandan gadat tebaisi asal yan minjat aminyo yoliban kokdan.

### *Nin pan kewalon tebaisi atne j, yan anek Pin kop gat tagisi egipne j*

#### *(Kilapmi 1.1-18)*

<sup>1</sup> Nak Jems, Pin kop ae Amin Tagi Yesu Kristo dakon oman amini. Papia on Israel amin 12 kabi ji kokupji yipmanek miktin njwakn warikon kiwit da ekwan ji do mandan yipbo obisak. Gildat tagisi.

### *Pan kilit da nin pan teban asak*

<sup>2</sup> Not kabi, pan kilit mibili mibili altan damni bisapmon butjik kinda jikon dima tosak, kisik kisik

dagin jikon tosak. <sup>3</sup> Nido ji nandan, yo noman tanej nandan gadatji panjiklikdak, unun da tebai agek jigi guramitnej dakon anpak panalon asak. <sup>4</sup> Toktogisi tebaisi agek jigi guramitni, yan anakwa unun anpak da jikon teban tosak. Yan anek Pin kop dakon anpak kindo do wadak wadak dima ani. Anpakji da tagisi ae kilegisi akdisak.

*Nandan kokwin kilegi do wadak wadak asak amin unun bisit asak*

<sup>5</sup> Ji da binapmon amin kindo nandan kokwin kilegi do wadak wadak asak kan, Pin kop da nandak imjak do bisit asak, anakwan Pin kop da imdisak. Pin kop da amin morap do yo morapmi yomisak, ae bisit iyan amin do yanba yokwi tok dima an yomisak. <sup>6</sup> Mani unun amin nandan gadatsi anek Pin kop do bisit asak. Nandan gadatni timisok di yipman degek "Pin kop da unun namdisak bo dima" yan dima nandisak. Nido amin but bamot an unun tap pakbi mirim da pisonakwan tamalikgan unun yombem. <sup>7</sup> Unuden amin Pin kop da yo kindo namdisak yan dimasi nandisak. <sup>8</sup> Unun amin dakon nandak nandakni yo dikon di yopman yopman asak, anek anpak morap asak unun kosit nan gin kanek dima agisak.

*Yoni mini amin gat ae yoni morapmi amin gat dakon gen*

<sup>9</sup> Not kindo yoni mini kan, kisik kisik tagi asak, nido Pin kop da dabilon man madepni ton da egisak. <sup>10</sup> Ae yoni morapmi amin Pin kop da mani abin yipmandak, do kisik kisik tagi asak, nido jarej

da biripmikwan unun da tilak kimotdan. <sup>11</sup> Gildat da wisak bisapmon gildat tepmisi wusinek jon pindakban kibidan mudon. Jon dakon jareni man mudanakwa, tilimni tagisi unun wagil pasilgan. Unuden gin yoni morapmi amin pini mibili mibili sigin anek kimot akdan.

*Pin kop yo tagisi an niminek yokwikon dima pan kisak*

<sup>12</sup> Pan kewal morap noman tonon jigi guramigek tebai akdak amin unun kisik kisik tagi asak. Nido pan kilit morapmon tebai atjak kan, Pin kop da minat aminyo but dasi galak tan iman unun do egip egip dakon pelit tim tilimi ton yom do yan teban tok agit, unun imdisak.

<sup>13</sup> Yokwi ak do pan kilit noman tan iba “Pin kop da an kilikban asat” yan amin kind a da dima yogogi. Nido, yokwi da Pin kop aripmi dima an kilitjak, ae Pin kop da amin kind a yokwi asak do dima an kilikdak. <sup>14</sup> Mani, nin kalon kalon dakon but dakon galaktok yokwi da pan kilikban yokwi agak dakon galaktok noman tosok. <sup>15</sup> Unun but dakon galaktok yokwi unun minat kind a da monji kwapmi awildak yombem da don yokwi analon aban noman tosok. Ae yokwi da si tagosok bisapmon kimot analon asak.

<sup>16</sup> Notnonisi, ji bikbik iba yokwi ami da ji di pan kilikban. <sup>17</sup> But galak dakon yo morap tagisisi unun Dat da yopban kwen da pan. Dat, kundukon teneni morap wasagit amin, unun anpakni kulabik dimasi asak. Unun gildat pan opmon yo dakon wupni dubak ton da ae don pisip ton unun

yombem dīma. <sup>18</sup> Uṅun yo morap wasagitgwan amin nin da wukwini egipneṅ do anek iyī dakon galaktok yolek gen bamī niban miṅat monjini da-gagiṁaṅ.

## **Nin Piṅkop do bamisi nandaṅ gadaṅ imamaṅ kaṅ, aṅpak tagisi kisi aneṅ**

*(Kilapmi 1.19-5.6)*

*Nin geni nandaṅek guramitneṅ*

<sup>19</sup> Not kabino, pakyaṅsi nandani. Ji morap gen nandak do mirak pakyaṅsi yopni, mani gen tepmi dīma yoni, ae butjap tepmi dīma nandani. <sup>20</sup> Nido, amin dakon butjap da Piṅkop dakon aṅpak kilegi dīma aṅalon asak. <sup>21</sup> Yaṅ do anek aṅpak iṅani mibili mibili gat ae aṅpak yokwi morap jikon madepsi ireṅ tosok, uṅun wiriritni. Anek disi do nanda-aba piṅakwa egek Piṅkop da gen uṅun butjikon kwaokgit uṅun naṅ abidoni. Gen uṅun da ji yok-wikon baṅ tagi timitjak.

<sup>22</sup> Mani gen uṅun isal dogin dīma nandani, si guramitni. Isal dogin nandaṅ kaṅ, disi baṅ paṅkewalgaṅ. <sup>23</sup> Amin kindā Piṅkop gen isal dogin nandaṅek dīma guramikdak kaṅ, uṅun amin kindā da wupni pakbi idapmon kosok uṅun yombem. <sup>24</sup> Uṅun iyī dakon tomno dabilni kosok, mani kiṅek tomno dabilni uṅun nianṅen uṅun tepmisi iṅtosok. <sup>25</sup> Mani gen teban gwaljigi minisi uṅun da yokwi dakon tapmim tuwilek nin pulugaṅ nipmandak, do amin kindā da uṅun gen teban pakyaṅsi kaṅban

pisanjakwan geni dima in̄tan̄ek guramitjak kañ, Piñkop da un̄un amin an̄pulugan̄jakwan pi morap asak un̄un tagisisi noman tokdañ.

<sup>26</sup> Amin kindā “nak Piñkop gawak imim silip an̄ kimokdot” yañ nandisak, mani gen kagani dakon kila tagi dima an̄ek gen yokwi morapmi yosok kañ, un̄un amin iyi nañ top an̄kewaldak, ae Piñkop gawak imim dakon silip asak un̄un yo isalisi. <sup>27</sup> Piñkop gawak imim dakon silip Piñkop Dat da kañban gwaljigi minisi ae gulusun̄ni mini asak un̄un yañ: Nin min̄at monjiyo meñ datyoni kimakbi gat, ae sakwabat gat do nandak nandak an̄ek pañpulugan̄ek jigini guramitneñ, ae nin dakon an̄pak kila tagisi aneñ, an̄apno miktim on dakon an̄pak yokwi da pañupbal aban Piñkop da dabilon in̄ani dima egipneñ.

## 2

### *Nin amin morap kisi do an̄pak aripsi gin aneñ*

<sup>1</sup> Not kabino, Amin Taginin Yesu Kristo tilimni madepsi, un̄un nandañ gadañ iman̄, do amin kindā do an̄pak tagi an̄ek ae kindā do manji imni kañ un̄un tagi dima. <sup>2</sup> Amin kindā yik imalyo tagisi ban̄ pañek ae kisit tamikon sip gol nañ wasan̄bi kindā yipman̄ek ji dakon muwut muwut yutjikon wigakwan yoni mini amin kindā imalni dagan̄bi ae yokwisi kindā un̄unyo kisi wugisak, <sup>3</sup> an̄akwal ji da an̄pak tagi amin yik imalyo tagisi ban̄ pak un̄un do an̄ im̄nek yañ iyañ, “Gak obiñ on tamo tagisikon yikgi”, ae yoni mini amin yañ iyañ, “Gak amodon akgi” bo ae “Nak da kandap da kapmatjok

mibilikon yikgi” yan iyan kan, <sup>4</sup> amin diwari tagi ae diwari yokwi yan nandan yan asak. Yan anek ji kokwin amin daganek nandak nandak yokwikon da kokwin an.

<sup>5</sup> Not kabino nandani. Miktin amin da dabilon yoni mini ekwan amin, unun bangin Pin kop da nandan gadat madepsi tujan yominakwan egipni do kili manjigit. Kalip yan teban tok yan agit, amin but dasi galak tan iman unun yopban iyi amin kila asak da kagagwan egipdan, do yoni mini amin iyi amin kila asak da kagagwan egipni do kili manjigit.

<sup>6</sup> Mani ji da yoni mini amin unun nandaba pinban yoman. Nam in da pabin depmanek jig i daminek ji timik gen pikon depman gan? Unun yoni morapmi amin dagan anpak unun an. <sup>7</sup> Pin kop da Kristo dakon mani tagisi jikon yipgut, nan nam in da unun do nandaban pinakwan jigilak gen yon? Unun yoni morapmi amin dagan yon.

<sup>8</sup> Pin kop unun kila amin madepnin, unun da papianton gen teban kind a nimgut da yan yosok:

“Gaga do but dasi nian galak tosol, unuden gin amin do but dasi galak tan yobi.”

Ji gen teban unun but dasi guramitni kan, ji anpak tagisi an. <sup>9</sup> Mani amin kind a do anpak tagi anek kind a yum koni kan, unun yokwi an. Anakwa gen teban unun da yan nolisak, ji gen teban tuwil tuwil amin. <sup>10</sup> Amin kind a Pin kop dakon gen teban morap kisi guramigek kalon i kind a nan gin kirinikdak kan, unun amin gen teban morap kisi

---

**2:5:** 1Ko 1.26-28    **2:8:** Mt 19.19; Gal 5.14    **2:9:** GT 1.17

**2:10:** MS 19.37; IDT 20.7-12,24; Mt 5.19

kirinikdak da arɪp gulusunni ton. <sup>11</sup> Nido, Pinƙop da yaŋ yaƓit:

“Miŋat eyo kili abi, ji yumabi anƙpak dima ani.”

Ae yaŋ kisi yaƓit:

“Ji amin dima dapba kimotni.”

Do yumabi anƙpak dima aƓil, mani amin kinda anƙakbi kimakƓit kaŋ, gak gen teban morap tuwil tuwil amin kinda dagagil.

<sup>12</sup> Pinƙop da anƙpakji kokwin asak biŋapmon uŋun ji pulugaŋ depmanƊak dakon gen teban uŋun do nandanek kokwin akdisak. Do ji uŋun do nandanek amin do bupmi nandanek toktogisi gen yogokji gat ae anƙpakji gat dakon kila tagisi ani.

<sup>13</sup> Nido amin kinda amin do bupmi dima nandagit kaŋ, Pinƙop da gen pikon kokwin asak biŋapmon bupmisok kinda dima nandan imdisak. Mani amin do bupmi nandagit amin uŋun gen pikon teban tokdisak.

*Nandan gadat anƙpak tagi dima paŋalon asak, uŋun nandan gadat yo isali*

<sup>14</sup> Not kabino, amin kinda da “Nak Kristo nandan gadan imisat” yaŋ yosok, mani anƙpak tagi dima asak kaŋ, nandan gadat uŋuden da yokwikon baŋ tagi abidosak? Uŋun dimasi. <sup>15</sup> Paŋmuwukbi notnin kinda bo ae saminin kinda imalni yokwi Ɠin, anƙkwan japni mini kaŋ, <sup>16</sup> jikon da kinda da yaŋ iyisak, “Butgo yawori tanakwan paŋki ŋaŋali egipbi, ae kin jap nanek butgo tugosak”, mani imal bo jap dima imisak. Isal gen Ɠin iyik uŋun da nian anƙpulugosak?

---

**2:11:** TP 20.13-14; Ro 13.9      **2:12:** Gal 6.2; Jem 1.25; 1Pi 2.16

**2:13:** Mt 5.7; 18.32-35      **2:15:** 1Jn 3.17

<sup>17</sup> Nandan gadat dakon anpak kisi yan gin. Nandan gadat isal tanek anpak tagi kinda dima noman tosak kan, unun yo isali.

<sup>18</sup> Mani amin kinda da yan yosak, “Amin diwari nandan gadat anakwa amin diwari anpak tagi an.”

Yan yanban kobogi yan yokdisat, “Gak nandan gadat anek anpak tagiyo kisi dima abi kan, nak nianon da gak dakon nandan gadat koken? Mani, nak dakon anpak tagi da nandan gadatno golikdisak.”

<sup>19</sup> Gak “Pin kop kaloni dagin egisak” yan nandan gadasal. Unun tagi. Mani kon yo kisi yan gin nandan gadanek madepsi nimmimikgan. <sup>20</sup> Nandan kokwingo tagi dima amin, gak nandan gadat gin anek anpak tagiyo kisi dima abi kan, nandan gadatgo unun yo isali. Gak gen on dakon mibili nandak do nandisal? Kan, nandaki, <sup>21</sup> kalip babaknin Abraham da monji Aisak altakon yipmanek Pin kop do paret aban Pin kop da yo agit unun kanek amin kilegi yan iyigit. <sup>22</sup> Pakyan si nandaki. Abraham dakon nandan gadat gat ae anpakni tagi unun kaloni gadagimal, anakwan unun anpak tagi da nandan gadatni aripmisi agit. <sup>23</sup> Do Pin kop gen papiakon gen kinda tosoq unun bami noman tagit. Gen unun yan:

“Abraham unun Pin kop do nandan gadat aban, Pin kop da amin kilegi yan iyigit.”

Ae amin da Abraham do Pin kop dakon notnisi yan iyiwit. <sup>24</sup> Do yan si nandani, amin kinda isal nandan gadat dogin Pin kop da amin kilegi yan



dima iyisak. Amin kinda anpak kilegi asak unun do nandanek amin kilegi yan iyisak.

<sup>25</sup> Yangin kosit oba minjat Reap da amin panman ak amin bamot unun uwal da dapni yan do pankisibinek yabekban kosit n̄waknwat nan̄ tobil kigimal, do Pin̄kop da minjat kilegi yan̄ iyigit. <sup>26</sup> Nin nandaman, amin kinda wupni kili yipman̄ dekgit kan, unun amin kili kimakgit. Yangin, amin kinda nandan̄ gadat an̄ek an̄pagon dima yipmandak unun amin nandan̄ gadatni kili kimakgit.

### 3

#### *Nin gen yogoknin dakon kila tagisi aney*

<sup>1</sup> Not kabino, jikon da amin morapmi da Pin̄kop gen yoyindet pi ak do nandak nandak dima ani. Nido ji nandan̄, Pin̄kop da minjat aminyo dakon an̄pak kokwin asak bisapmon minjat aminyokon yoyindet pi an̄ amin unun pakyan̄si kokwin akdisak.

<sup>2</sup> Nin kisi morap gulusun̄ morapmi aman̄. Mani amin kinda gen kagani dakon kila an̄ek gen yokwi kinda dima yosok kan, unun amin gwaljigi minisi, ae unun da giptim diwat morapni kisi kila tagi asak.

<sup>3</sup> Os da nin dakon galaktok yolek kosit agipni do gen kaganikon ain tim yopman̄gaman̄. Yan̄ an̄ek giptimni kisi iligapno nin dakon galaktok yolek akwan̄.

<sup>4</sup> Ae tap wakga yo kisi do nandanen̄. Tap wakga unun yo madepsi daman, ae mirim madepsi da pison̄akwan tap idapmon agisak. Ae tap wakga antobilakwa agisak dakon kindap kwik

uñun moniñisisok. Mani tap wakga awıldak amin timi kindakon kik do asak kan, uñun tap wakga dakon yo uñun antobil tobil anakwan dukwan kik do nandisak uñudon kisak. <sup>5</sup> Uñuden gin, gen kaga uñun giptim dakon diwari moniñgok kinda, mani iyi dakon man awigek yo madepsi do yosok.

Kindap moniñgok kinda da sojek madepsi anek koron sojek kindap morap tagini sosak. <sup>6</sup> Gen kaga uñun kindap kinda, yokwini uñun madepsi daman. Uñun da kindap tepmisi kwan sosok uñun da tilak anpak yokwi mibili mibili panalon anek egip egipnin madepsi panupbal asak. Ae Sunduk Tipdomon egisak uñun da amin da gen kagakon kindap uñun yipban sosok.

<sup>7</sup> Amin da jon kilap mibili mibili gat, ae minam, ae tunon amin, ae tap idapmon yo morap ekwan uñun timigek yo uñun kilani anakwa uñun da kisiron ekwan. <sup>8</sup> Mani gen kaga uñun tapmimni madep do amin kinda da iyi dakon gen kaga kila aripmi dima asak. Bisap morapmi gen kaga gen yokwi morapmi yosok. Uñudon amin dapdap marasin yokwi madepsi tugawit da ton. <sup>9</sup> Gen kagakon da Amin Tagi Datnin ankisaman. Mani bisap diwari nin da minat aminyo Pinkop da iyi yombem wasagit uñun jobit yomaman. <sup>10</sup> Gisam yomyom gat ae jobit gat kisi uñun gen kaga kalonon dagin noman tomal. Not kabi, uñun tagi dima. <sup>11</sup> Pakbi dabil kalonikon da pakbi si noknogi ae amin da dima noknogi yo kisi aripmi tagi potpori? <sup>12</sup> Not kabi, pik kindap da olip sop tagi potni? Ae wain nap da pik kindap dakon sopmi

tagi potni? Yangin pakbi isipmi da pakbisi aripmi dima dagoni.

*Nandak kokwini tagisi amin da anpak tagisi akdisak*

<sup>13</sup> Ji da binapmon nandan kokwini tagisi ae nandak nandakni tagisi amin kinda egisak kan, unun amin bisapmi bisapmi anpak tagisi asak, ae nandan kokwini tagisi do iyi dakon man dima awigisak. Yan anakwan amin da kanba amin nandan kokwini tagisi ae nandak nandakni tagisi asak. <sup>14</sup> Mani ji tagisi ekwan amin do nandaba yokwi tok an kan, ae bisapmi bisapmi ji disi dakon man pawigik do kosit wusik an kan, nandan kokwin tagisi gat ae nandak nandakji tagisi gat do kisik kisik dima ani. Top anakwa anpakji da gen bami di abin yipban. <sup>15</sup> Nandan kokwin yokwi unuden Kwen Kokup da dima pisak. Unun on miktin dakon yo gin. Unun Pin kopmon da dima abisak, Sunduk da analon asak. <sup>16</sup> Nandani, tagisi ekwan amin do nandaba yokwi tok anek bisapmi bisapmi iyi dakon man pawigik do kosit wusik an amin da binapmon pidok pidok madepsi noman tosok, ae anpak yokwi morap unuden da noman ton.

<sup>17</sup> Mani amin nandan kokwin tagisi Kwen Kokupmon nani ban timikgan unun da anpak yan an: Mibiltok nandak nandak gwaljigi mini unun yolgan, ae unun da bunon amin gat but kalonji ekwan, ae anpak yawori an yoman, anek pinbisi egek amin diwari dakon gen nandanek ekwan, ae amin do bupmisi nandan yominek anpak tagisi anyoman. Unun amin morap kisi do anpak tilak kalonikon gin anyoman. Ae jamba but anpak dima

aŋ, uŋun aŋpak tagi yol kimokgoŋ. <sup>18</sup> Nin but kalon ekwamaŋ kaŋ, uŋun jap yet kwaokgamaŋ yombem. Do uŋun but kalon aŋpagon jap da pigaga kwon uŋun da tilak aŋpak tagisi da egip egipninon noman tokdaŋ.

## 4

*Miktim dakon aŋpak do galak toŋ amin uŋun Piŋkop dakon uwalni*

<sup>1</sup> Gen emat gat ae butjap ukwayityo binapjikon noman toŋ uŋun mibili nido noman toŋ? Uŋun yokwi dakon but suligik dakon aŋpak mibili mibili butjikon emat aŋ, uŋun da gen emat ae butjap ukwayityo paŋalon aŋ. <sup>2</sup> Ji yo timit do nandaŋ, mani dima timikgaŋ, do ji amin dapba kimokgoŋ. Ji yo do pindak galaktok aŋ, aŋek uŋun aripmi dima timitni, do butjap ukwayit yo aŋek gen emat aŋ. Piŋkop da yo damjak do bisit dima aŋ, mibili yaŋ do aŋek yo dima timikgaŋ. <sup>3</sup> Ae yo timit do bisit aŋ bisapmon yo dima timikgaŋ, nido nandak nandakji kilegi dima taŋakwan Piŋkop bisit aŋ iman. Ji but dakon galaktok yokwi yolek giptimji da kisik kisik asak uŋun dogin nandaŋ.

<sup>4</sup> Miŋat da eni yipmaŋek kiŋ yumabi aŋpak asak uŋun da tilak ji Piŋkop kili yipmaŋ dek mudan. Nandani, miktim dakon yo do galagi nandisak amin uŋun Piŋkop do kuragisi nandaŋ imisak. Uŋun dima nandaŋ, ma? Nandani, on miktim not aŋimisak amin, uŋun Piŋkop dakon uwalni dagosok. <sup>5</sup> Piŋkop dakon papia da yaŋ yosok, “Wup uŋun Piŋkop da nin da butgwan yipgut uŋun

yo morap yopman mudane*k* iyi dogin galaktan kimotne*n* do nandisak.” Gen unun gen isali yan nandan, ma? <sup>6</sup> Mani Pin*k*op da nin do nandan yawot madepsi an nimisak. Mibili yan do anek Pin*k*op dakon papia da yan yosok:

“Pin*k*op da amin iyi dakon man pawikwan amin yo ak do nandan unun dima ani do kosit sopman yomisak,  
mani amin iyi do nandaba pan unun nandan yawok yomine*k* yo tagi an yomisak.”

<sup>7</sup> Do ji disi do nandaba pinakwan Pin*k*op da yongamwan egipni. Sunduk kosit sopman iminakwa depman dek pasal kikdisak. <sup>8</sup> Pin*k*op da kapmatjok kini, anakwa Pin*k*op ji da kapmatjok apjak. Yokwi pakpak, amin da kisitni pakbikon suganba kilegisi an, unun da tilak butjikon yo yokwi ton unun suganba kilek tan mudoni. Jamba but amin, butjikon nandak nandak yokwi ton unun wiririk mudoni. <sup>9</sup> But yokwi anek kunam morapmi tatni. Abisok jikgo yanjan amin, kulabik anek kunam tatni. Abisok jikgo yanjan amin, kulabik anek butji jik tanakwa egipni. <sup>10</sup> Amin Tagi da dabilon disi do nandaba pini. Yan ani kan, Amin Tagi da ji pawigikdisak.

*Nin amin do yanba yokwi tok dima ane*n**

<sup>11</sup> Not kabi, panmuwukbi notji diwari do yanba yokwi tok dima ani. Amin diwari do yanba yokwi tok asak bo ae notni dakon anpak kokwin asak, unun gen teban do yanba yokwi tok anek gen teban kokwin asak. Ae gen teban kokwin asal kan,

---

**4:6:** YT 3.34; 1Pi 5.5    **4:7:** Ep 6.12    **4:8:** Ais 1.16; Sek 1.3; Mal 3.7    **4:10:** Jop 5.11; 1Pi 5.6

gak gen teban dima guramikdal, unun gen teban dakon kokwin agak amin dagal yan asak. <sup>12</sup> Pin kop kalon dagin gen teban panalon agit, unun kalon dagin Gen Kokwin Amin egisak. Ae unun kalon dagin minjat aminyo yokwikon ban tagi timitjak, ae tagi panupbal asak. Do gak namin da amin dakon anpakni kokwin asal?

*Nin kwen wigik dima anen*

<sup>13</sup> Jikon amin diwari da yan yon: “Abisok bo anwa kokup pap kindakon kin monej ilit pi anek bilak kind a egipne. Yan anek monej morapmi timitne.” Yan yon amin ji do gen yipmandat. <sup>14</sup> Ji gen unuden ban yon, mani anwa yo ni da noman toni unun dima nandan. Egip egipji mukwa da yan noman tanek bisap pisipmisok gin tanek wagil pasilgan unun yombem. <sup>15</sup> Ji yan gin yoni kan tagi, “Amin Tagi da galak tosagon nin sigin egek yo unun ak do nandan unun anen.” <sup>16</sup> Mani disi dakon man pawigek disi pi madep akdan unun do yon. Unun yokwisi. <sup>17</sup> Pakyan si nandani, amin kind a anpak tagi si kind a ak do nandanek dima asak kan, unun amin diwarini ton.

## 5

*Yoni morapmi amin kobogi yokwisi timitdan*

<sup>1</sup> Nandani! Yoni morapmi amin ji do gen yipmandat. Kunam tagek yan tidoni! Nido jigi madepsi da jikon noman tan damdisak. <sup>2</sup> Yo morapji gat ae tilimji gat kili miktan mudan. Ae imal morapji yo monin da kili nan mudan. <sup>3</sup> Golji

---

**4:12:** Ro 2.1; 14.4    **4:13:** Lk 12.18-20    **4:14:** Kap 39.5,11; YT 27.1    **4:17:** Lk 12.47    **5:2:** Mt 6.19

gat ae silwasi gat unun manut an mudan. Unun manut da ji dakon yokwisi panoman aban nomansi tentenokdan, anek manut da giptimji kindap da yan sonba sokdan. Mibi bisap kili ununjok noman tokdisak, anakwan ji isal dogin yo morap gat monen gat panmuwugan. <sup>4</sup> Nandani. Pi monji da pigagasi jap pawit. Anakwa ji da yuman nogini diwari pankutnaneke diwari gin yongwit. Monen diwat unun da Pin kop da anpakji yokwi unun dakon kobogi damjak do madepsi yan tidon. Ae pi monji unun dakon bupmi kunamyo da Amin Tagi Tapmim Ami da miragon kili pigigit. <sup>5</sup> Miktimon egipgwit bisap morapmon ji yo tagi tagi morapmi timigek disi dogin nandanek kisik kisik anek egipgwit. Jap morapmi nanek madepsi tagawit, do dikba kimotni dakon bisap kili noman tak. <sup>6</sup> Amin kilegi gen yan yominek kili dapba kimakgwit. Unun iyi kutnok do yo kinda dima awit.

## **Nin tebai agek bisit anek Amin Tagi dakon abap do jomjom anen** *(Kilapmi 5.7-20)*

*Nin jigi guramigek Amin Tagi dakon abap do  
jomjom anen*

<sup>7</sup> Do not kabi, butji yawori tanakwa jigi guramigek Amin Tagi da ae apjak unun do jomjom ani. Disi nandan, pigagani ton amin unun jap tagisi kwokdan unun do jomjom anegisak. Unun butni anteban anek yawori egek jomjom anakwan sikak gildatyo da pini anakwal don bami pasak. <sup>8</sup> Jiyo

---

**5:4:** GT 24.14-15    **5:5:** Lk 16.25    **5:7:** GT 11.14; Jer 5.24  
**5:8:** Ro 13.11-12; 1Pi 4.7

kisi butji yawori tanakwa jigi noman tan daman unun guramitni, nido Amin Tagi da apjak bisap unun kwan tosok. <sup>9</sup> Not kabi, notji do yanba yokwi tok dima an an ani. Pinjop da gen pikon di depban. Nandani, Gen Kokwin Amin Madep yoma kagakon akdak.

<sup>10</sup> Not kabi, kombi amin kalip Amin Tagi da manon yan tentenok awit unun do nandani. Uwal da yo yokwisi anyomgwit, mani butni yawori tanakwa jigi unun guramikgwit. Ji unun dakon anpak timigek yolni. <sup>11</sup> Nandani, nin yan yoman, “Amin butni panjeban anek yawori egek jigi guramigan unun Pinjop da gisamikban kisik kisiksi ekwan.” Jop dakon geni kili nandawit. Unun butni anjeban anek yawori egek jigi morap noman tan imgwit unun guramikgit. Disi nandan, don Amin Tagi da anpak tagisi an imgut. Asi nandaman, Amin Tagi da amin nin do but dasi galak tan nimisak, ae bupmi madepsi nandisak.

### *Gen yan panjeban ak dima ani*

<sup>12</sup> Not kabi, gen madepsi kinda unun yan: Ji Kwen Kokup bo miktin bo ae yo di da manon genji dima yan panjeban ani. Yo kinda ak do nandan kan “Asi” yan gin yoni. Mani dima ak do nandan kan “Dima” yan gin yoni. Genji yo di da manon yan panjeban aba Pinjop da kobogi yokwi di daban.

### *Amin kilegi dakon bisit unun tapmimi ton*

<sup>13</sup> Jikon da kinda jigi pasak kan, Pinjop do bisit asak. Ae kinda dakon but kisik kisik nandisak kan, unun Pinjop dakon man anjisik do kap yosak.



<sup>14</sup> Jikon da kinda sot asak kaŋ, paŋmuwukbi dakon kila amin yaŋ yoba opni. Abiŋek Amin Tagi da manon bit nelak giptimikon soŋ imiŋek Piŋkop da anpulugaŋban kilek tosak do bisit ani.

<sup>15</sup> Piŋkop do nandaŋ gadaŋek bisit ani kaŋ, Amin Tagi da sot amin uŋun aŋmilip aŋek aban pidokdisak. Ae yokwi agit kaŋ, Amin Tagi da diwarini wiririk imjak. <sup>16</sup> Yaŋdo, ji kalon kalon diwarisi Piŋkop dakon miŋat aminyokon yaŋkwok ani. Aŋek ji kalon kalon Piŋkop da amin diwari paŋpulugosak do bisit ani, aŋakwa Piŋkop da ji paŋmilip asak. Amin kilegi kinda da bisit asak kaŋ, bisitni uŋun tapmimi toŋ, ae amin diwari tagisi paŋpulugogi. <sup>17</sup> Elaija miktim amin nin yombem. Mani sikak dima mosak do bisit tebai aŋakwan, sikak dima maŋakwan bilak 3 ae kanek 6 agit. <sup>18</sup> Don bisit aeni aŋakwan kundu da sikak yipban maŋakwan pigaga jap aeni kwawit.

*Kosit yipmaŋ dekgit amin abidaŋ aŋopneŋ*

<sup>19</sup> Not kabino, jikon da kinda Piŋkop dakon gen bami yolyol kosit yipmaŋ degakwan amin kinda da abidaŋ aeni aŋopjak kaŋ, <sup>20</sup> uŋun amin aŋpak tagisisi naŋ asak. Gen on do pakyaŋsi nandani. Amin kinda yokwi pakpak amin kinda anpulugaŋek kosit yokwikon naŋ abidaŋ Piŋkopmon ae aŋopjak kaŋ, uŋun amin yokwi pakpak amin kimoron naŋ abidaŋakwan kimot dima asak. Ae Piŋkop da yokwi pakpak amin dakon yokwini morapmi yopmaŋ yomgut.

---

**5:14:** Mk 6.13      **5:15:** Mt 17.18-20      **5:17:** 1KA 17.1; 18.1  
**5:18:** 1KA 18.42-45      **5:19:** Gal 6.1      **5:20:** YT 10.12; 1Pi 4.8

**PIN<sup>K</sup>OP GEN**  
**The New Testament and Psalms in the Yopno Language**  
**of Papua New Guinea**  
**Nupela Testamen na Buk Song long tokples Yopno long**  
**Niugini**

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 22 Feb 2024 from source files dated 31 Aug 2023

b683ce50-d820-5bfc-8471-d8ee080be106